



Nigeria tiri sorkar ketcangsürtem
bendang limai meyoktsü

MS Dhoni-i CSK captain
mapa toktsügo

VOL. XXI ISSUE NO. 159 (ADOK 159) DIMAPUR ROGONÜ (FRIDAY)

METSÜREMI (MARCH) 22, 2024

₹ 5.00

KT Zimik nem NPF ticket agütsü

Kohima, Metsüremi/March 21 (TYO): Aruya aliba Lok Sabha election nung II-Outer Manipur Parliamentary Constituency nung tokteptsü Naga People's Front (NPF) ajanga Brehostibarnü Kachui Timothy Zimik nem NPF ticket agütsügo.

Iba ticket ya NFP Central Office, Kohima nung MLA Kuzholuzo (Azo) Nieno and leader NPF Legislature Party; MLA Achumbemo Kikon aser Manipur nungi MLAs Ram Muivah aser Leishiyo Keishing nungertem lia NPF tir Apong Pongener-i Zimik nem amokja liasü.

Iba sentong nung jembidang, NPF ya Naga nunger asoshi nokdaker asünung iba party ticket amer election nung tokteptsü tejangraba liasü, ta Zimik-i ashi.

Iba Lok Sabha election nung ni shmtetra Parliament nung Naga nunger yimten ken o süoka jembitsü, ta pai ashi.

"Naga nunger ajungtsü asoshi asenok lungjemtsüla aser külemi

Assam ajanga kümanga senzütsüla

Dimapur, March 21 (TYO): Aruya aliba Lok Sabha election ya Nagaland nung April 19 nü agitsü aser Assam nunga kasa anogo nungi tenzüka agitsü elections sentong alinungji, linük ajak den külemi Nagaland aser Assam nunga 'Model Code of Conduct' amshi tenzükogo.

Electon nung amshiba 'Model Code of Conduct' tetezü, election agitsü anogo sangdunger vote mazüng tashi election agütsüba tesem nung nübortem senzüsenpong aser inyaksangshi nung kechi inyaktsüla aser kechibo meyaktsüla ta asüba teinyaktsü aser meyaktsü tetuyuba Election

Commission ajanga latetsüba mapatem lir. Item meyaktsüba mapatem rongnung ainlen jadang nisung ka ket nung sen meyirijang 20 dak tali bena malitsüla aser temelaba akaba prangbong süaka bener mejajatsüla. Ibai, talisa, asenok Naga nungertem Assam lima ajanga jajadang mamadoki benshütsüla ta tanü iba osangbeneri government ketcangsürtem ka den jembidang metedaklsü.

Ano, gari nung jajartem asoshia gari dak sendakba kaket ajak shitak alitsüla aser seat belt shitak agir jajatsüla, iba lagi senchi tulu nungi kümzütsü ta paisa ashi.

Nükjidong atongtsü asoshi ajak lungjemtsününgdaker: Starson Lamkang

Dimapur, Metsüremi/March 21 (TYO): Tsüngrem taochi ajanga asen linük tenzüker mapang apen kumzüka arur. Asen anemer temi telemsa adokdaktsüba tasa balala amshia asenok tsüngta telemsa külakoktsüba asenoki angateter.

Naga revolutionary movement ya tiyong nung aliba Naga nungeri tentet aser asen yimtenren asendenshi aser aser yimten temeden tashi mait kumdaktsütsü meranga yimtenren tsütsü Naga nungeri külakoktsüba asenoki angateter.

1966-1967 tsüngta trokben jembishinü kaogo aser NNC sadanger RGN (1968) kumtet aser temai adoka bendanga agütsür BSF battalion kumteta liasü, iba sülen Shillong Accord (1975) ajanga NNC anema nokdak aser NSCN/GPRN (1980-1981) tentet, ta pai ashi.

Indian Open-door policy (1987) ajanga NSCN/GPRN ya NSCN-IM aser NSCN-K kuma telemsa adok.

2015 küm NSCN-IM ajanga Framework Agreement zülutep aser NNPG Working Committee ajanga 2017 küm Agreed Position nung meyongnem agüja liasü, koba telok 20 jüngüla lemsadaktsütsü nükjidong nung yangluu liasü, ta

pai ashi.

Item accords aser agreements tem ya lepa reprangdangra, asen anemer temi asen yimtem temeden tashi mait kumdaktsütsü meranga yimtenren tsütsü Naga nungeri külakoktsüba asenoki angateter.

Naga revolutionay movement ya tiyong nung aliba Naga nungeri tentet aser asen yimtenren asendenshi aser aser yimten temeden wazüka ayuba nungi meyüngbur aser lenir ama lia arur, ta Starson Lamkang-i ashi.

Iba yongji ner tsüngsü nung anidaka East, West, North aser South kinük ajunga nungi Naga nunger temi Naga National Movement asoshi ayongzükba ama iba Movement nung aden. Külemi tongpu aputepa asen yimten temeden wazüka ayur aser central Naga tesemtem nung tensa majungba mapang kati ka kumzüktapa aru. Anungji tiyonglen aliba Naga nunger dang maneni asen yimtenren temeden senmang agitetsü asoshi lungjemer anitsü ayongzükba, ta pai ashi.

Soriso K Quinker, Additional S.P. Wokha ajanga ashiba agi, March 20, 2024 nü tanutsüla tebui FIR ka benokba nung lar jala dak Deobar aonung la aliba kiburi züka merenshiba shia liasü.

Tanutsüla tebui FIR nung ashiba agi, par jala school azüngba nung indokba sen ajak kiburi menoktsü aser pei jala chichiba

Lok Sabha elections atema Kohima nung ketcangsürtem asendenshir

Kohima, Metsüremi/March 21

(TYO): Lok Sabha atema General Election agitsü asoshi terenemshiba ka amai Deputy Commissioner, Kohima indang Conference Hall nung March 21, 2024 nü tongtipang senden ka mena liasü.

Iba senden nung Deputy Commissioner, Kohima, Kumar Ramnikant, IAS; Expenditure Observer Vivek Chauhan IRS; Superintendent of Police, Kohima, Bharat Laxman Markad, IPS; Election Expenditure Monitoring (EEM) Team nungi ketcangsürtem, enforcement agencies aser political party balala nungi lenirtem dena liasü.

Deputy Commissioner, Kumar Ramnikant, IAS ajanga polling personnel ajunga dang saksalema alitsü nenshia ashi aser political party nungi teshimtet

nisungtem dang Model Code of Conduct shidak amshitsü metedaktsü.

Pai political party nungi teshimtet nisungtem dang aibelen masütsü asoshi arendaka melie jangjateptsü ajungshi aser inyakyim ajak ozüng agi melaba ama alitsü nüngdak ta ashi.

Paisa political party tem dang election ketcangsüri yaritsü ta ashi aser parnoki inyaktsüba nomination aser election procedures indanga lemsatepa liasü.

Iba den külemi Electronic Voting Machines (EVMs) belenshiba nung ochishia inyaktsü ta ashi aser political party tem nema verification atema machine ajunga reprangtsü shia liasü.

Election nung matongmala malitsü mechii Expenditure

Observer Vivek Chauhan, IRS ajanga saksalema alitsü ayongzük aser taoba election nung ama tajungtiba nung election agitetsü ayongzüka liasü.

Election Commission ajanga nüklä tajung yua aliba indang pai lepshia ashi aser polling personnel dang reports tem tajungtiba nung memonui agütsü ashi.

Kasa senden nung SP Kohima, Bharat Laxman, IPS ajanga jembidang Kohima ya transit route tongtipang ka lir, anungji polling personnel den amalitep akatsü tongtipang ta ashi.

Pai teyari asoshi mapang shidak nung ozüng amshirtem den osangtsüsang agiteptsü ajungshi aser private aser government gari tem kanga junga meita aotsü ta ashi.

Tema nung aliba lenirtem mezüng lungjemtsüla: Gen. Niki Sumi

Dimapur, Metsüremi/March 21

(TYO): Gen. Niki Sumi (Retd.) President, NSCN/GPRN ajanga 44th Naga Republic Day anogomung nung jembidang, asen anemertem agi müketbanger telemsa adoktsü anameta nungi alidang Naga nungeri takok angutsü asoshi kanga junga shisadangtsüla, ta ashi.

Tsüngremi asenok ajak nükjidong ka-ka yur yanglur, saka tesasatsüka NPGs, state ketcangsür/politicians aser tamangba yimsü lenirtemi pei tejangraba nem kokdaktsür tang

masü pei tejangraba mezüng südakja yangji India indang telesma adokdaktsüba tasa agi yarisemer, ta ashi.

Anungji asen Naga nungeri Naga nunger aliba tesem nung telesma tali adokba (factionalism) ajanga Naga nunger ajangzüksü asü masü ta kanga süoki ia shisadangtsüla, ta ashi.

Tatishitsü agi, MLAs aser Minister temi tamangba yimsü nung teka sangshir aser yamaji tamangba yimsü tsütsü lenirtemia inyaker.

Pei agitsü atema kisüng bilemba ajanga telemsa tali adokdaktsü aser linük taginüba

Kin balala lenirtemia linük yangertsü asoshi shilem agitsü pei teinyaktsü amadokogo. Lenir tajung aika lir aser ni yamai arok sasep nung jembiba asoshi mejashitsü ta amanger, ta pai ashi.

Over-ground lenirtemia timba lir, saka teti underground teloktem tenüng asentsü yimya sübaogo. Parnok mezüng lungjemer political groups tem dang ka kuma lungjemer Naga nungeri aginüba bushitsü

ajungshitsüla, ta Gen. Niki Sumi-i ashi.

Tatishitsü agi, tribal hoho temi youth fronts tenzüker aser kin balala tsünta tokteptsü asoshi miima parnok renemshidaktsür. Naga Hoho, Naga Students Federation aser Naga Mother's Association ama tawabangba ka küboki lokti tentet ajak aitdakja kati ka den teka amteper linük yangerba nung kin balala lenirtemi shilem kechiba magiteter?

NSCN/GPRN-i Naga Nation ka, Naga nübur ka dang aser ajak adenba Naga political solution nung amanger. Anungji Naga nunger ajak ka kuma lungjembä ajanga dang asenoki jangraba aser aginüba ama nükjidong tongtettsü ta tangatetba nung NSCN/GPRN nokdaka lir. NSCN/GPRN ajanga asen Naga nunger yimten temeden senmang wazüka aru aser wazüka ayutsü, ta Gen. Niki Sumi-isa ashi.

Wokha nung tetsürchanu ka züka merenshi

Dimapur, Metsüremi/March 21

(TYO): Wokha nung arishi küm toku tanur tetsür ka züka merenshiba yong lar kibur ya police ket nung yua lir.

amai anepalua anir alitsü kinungertem tsünta 2021 küm mulungtepa liasü.

Ajisüaka March 19 nü kidanger ka indang phone nungi jalai tebu dangi call súa la züka merenshiba osang metedaktsü. Tanutsüla ya la aliba kidang nungi la teti-i anizüker ao ta ashir.

Tebui FIR benokba sülen Police Department aser Women Police Cell, Wokha nungi sepaitem yoka tai tonglokja alir ya apu aser asüngdangyatsü atema police station-i bener aru, ta Quinker-i ashi.

Wokha nung alir kati yashi nikongdang 2:30 ako meta osang aruba sülen tanutsüla aliba tesem

jangjatetsü asoshi mera agia liasü, ta Child Welfare Committee nung chairman, Mhongchumi Humtsoe-i ashi.

Tanutsüla ya lar kinunger temi anizüker ogo ta angazükba sülen committee ajanga la ya medical examination atema Civil Hospital, Wokha bushia anir ao.

La temang kanga junga reprangba mapang la temang nung yiruba zübü balala aliba ngutet. Committee ajanga tanutsüla dak nungi osang tali tejangjaba bendentsü merang, saka la kanga tsübuokba mechii tatalokba ajakbo mashi, ta Humtsoe-i metedaktsü.

Additional Secretary, Home, Shayung Phom den tepila sentong agi



Dimapur, Metsüremi/March 21 (TYO): Mapa nungi anenba Additional Secretary, Home, Shayung Phom NCS den March 21 nü Conference hall, Nagaland Civil Secretariat, Kohima nung tepila sentong agiogo.

Sentong nung o jembiba mapang Home Commissioner Abhijit Sinha-i, mapa toktsuba ketcangsür den küm aika inyaka aruba mapang pa ya kanga dang nendaka inyakba aser pa den inyaksemer ajak den ochishia inyakba nisung ka ta reprangetogo, ta ashi.

Paisa, Shayung ya bendanga agiija inyakba ketcangsür ka liasü, shiba sorkar aser nüburtem pai akokba tajungtiba agi tenzükogo aser talisa pa mapa inyaka aliba mapang timba kinük nung aliba tesem nung alirtem den inyaka aruogo, ta ashi. Sinha-isa, pa mapa inyaka

aruba tesemtem reprangdangra, kinük nung aliba tesemtem ajak nung sorkar inyakyim tajung tonga bener otsütsü atema pai bendanga agiija inyakba reprangtettsü ta ashi. Paisa, Phom nem pa mapa tajung asoshi tenüngsang agütsü aser mapa nungi anener anema pela alitsü imlaja ataba lemsatep.

Sentong nungsa Secretary Home, Orenthung Lotha-i home department tenüng nung jembiba mapang, 1996 NCS batch mates tem rongnung Phom nem dang tongtibang aser tetsükdaktsü aika aketba mapatem nonglokja liasü aser pai takokba tashi state sorkar aser nüburtem bendanga agiija tenzükogo, ta ashi. Mapa nungi anener anizüngzüka alitsü imlaja ataba den Phom-i mapa nungi anenba sülena maneni nüburtem asoshi inyaktsü imla-a ataba paisa lemsatep laisü.

Kasa mapang nung tepila o jembiba mapang Shayung Phom-i, Civil Secretariat nung department tem dang MTA tem mapa nungi anenba mapang parnok mapa yari tepila sentong tapet renema katsütsü mepeshi, kechiyong temaba jenjang nung aliba ketcangsürtem atema dang tepila sentong meraketa ayongzüka katsüba pai ajangshia aruogo, ta ashi.

Maneni pai, pa mapa inyaka aliba mapang department nung ketcangsürtem aser staff temi pa dang maneni len sayuba aser pa nongita yariba atema kanga pelaba lemsatep. Paisa, pa mapa nungi anenba sülena maneni takokba tashi nüburtem ajangzüksü atema inyaktsü imla ataba lemsatep.

Sentong nungsa NSSA, Grade-IV Association aser NCS batch mate Kovi Meyase nungeria tepila o jembiba liasü.

Election Commission of India-i tetuyuba agütsü

Dimapur, Metsüremi/March 21 (TYO): Election Commission-i ken o ajak kanga junga asadangba sülen taruba Lok Sabha General Election aser Andhra Pradesh, Arunachal Pradesh, Odissa aser Sikkim Legislative Assembly election aser state 13 nung Assembly Constituency 26 Bye Election atema elector shirnok nem EPIC agütsüogo, parnoki maitsü jangjatsü atema vote magütsü tsüngda station tem nung EPIC sayutsü tetuyuba agütsüogo.

Electors shirnoki EPIC mesayutetlir parnoki tekiboklen agiija aliba photo identity kuli kaket mashi ka sayutsüla.

Kuli kakettem:-

1. Aadhaar Card,
2. MNREGA Job Card,
3. Passbook with photograph issued by Bank/Post Office,

4. Health Insurance Smart Card issued under the scheme of Ministry of Labour.
 5. Driving License,
 6. PAN Card,
 7. Smart Card issued by RGI under NPR,
 8. Indian Passport,
 9. Pension document den noksa,
 10. Central/State Govt./PSUs Public Limited Company temi employee tem nem agütsüba Service Identity Cards den noksa photograph,
 11. Official identity cards issued to MPs MLAs/MLCs, and
 12. Unique Disability ID (UDID) Card, M/o Social Justice & Empowerment, Government of India.

Maneni EPIC nung zülujiang aibelen mesüra clerical aibelen amala lira itemjibo sentoka

toksüttettsü, ajisüaka election ka maitsü EPIC-i jangjatsüla. Elector kati Assembly Constituency tanga ka indang Electoral Registration Officer kati agütsüba EPIC ka sayura iba amala EPIC ya-a agizüksü, ajisüaka elector ka vote agütsüsi atema aruba polling station indang electoral roll nung pa/la tenüng alitsüla.

Noksa amala meputepba ajanga elector ka indang maitsü mejangjatetsüsa kümra elector kati temalen shisema aliba photo document rongnung ka sayutsüla.

Bendanglen aliba elector tem parnok indang Indian Passport dak ajemdaker Representation of the People Act, 1950, Section 20A kübok polling station tem nung parnok indang passport ajanga dang (tanga kuli kaket kecha magitsü) maitsü jangjatsü.



DDCF sanen luden senden ayonger

Dimapur, Metsüremi/March 21 (TYO): Dimapur District Citizens' Forum (DDCF) sanen luden senden March 23 (Honibarnü) DDCF Office, OC-8 Naga Shopping Arcade nung 11 ako nungi tenzüka amentsü.

Senden dak sendakba nung ajanga metedaktsüogo.

Kohima DC-i tetuyuba agütsü

Dimapur, Metsüremi/March 21 (TYO): Kohima Deputy Commissioner Kumar Ramnikant, IAS-i sangdong ka ajanga Lok Sabha, General Election agütsüba anogo sangdongba sülen nomination file asütsü, nomination papers Scrutiny aser candidature aginba inyakyim kecha tetsükdaktsü makai agütsü

atema Congress Bhavan Junction nungi SBI Main Branch, Kohima tashi lenmang nung gari manentsü tetuyuba agütsüogo.


March 30 nü nungi tenzüka iba lenmang nung gari tem anepdang 10 ako nungi nikongtsütsü 3 ako tashi manentsü atema tetuyuba agütsüogo.

Dimapur Police-i rakzükrakdemer ka puogo

Dimapur, Metsüremi/March 21 (TYO): March 19 nü Highway, Purana Bazaar, Dimapur nung tata gari anishirtem dang nungi ozüng alema senotsü meshia aliba mapang Dimapur Police-i nisung ka puogo.

Aija alisang ya SS Leacy NSCN/GRPN(R) Kaboka K. Assumi (arishi küm 32) ta jangjago.

Pa ket nungi NSCN/GRPN(R) indang yearly vehicle tax slips 14 den sen ngutetogo.



Iba dak sendakba nung East Police Station nung ken o ka benokogo, ta Dy. Commissioner of Police HQ, Dimapur sangdong ka ajanga metedaktsü.

Kma District level standing committee senden menogo

Dimapur, Metsüremi/March 21 (TYO): Taruba Lok Sabha General Election dak sendakba nung March 21 nü Model Code of Conduct (MCC) sülen tashi anga anidaktsü mepeshia metedaktsüogo.

Paisa, züngsemtem dang election dak sendakba nung nüngdak adokba mapang senden balala amentsü atema renema alitsü metedaktsüogo.

Senden nunga SDO HQs Kohima aser Nodal Officer MCC, James Renbi-i Mode Code of Conduct dak sendakba nung PowerPoint presentation tejangja ka agiija liasü.

LIVINGSTONE FOUNDATION INTERNATIONAL
THAHEKHU / KEVIJAU, DIMAPUR - 797112
NAGALAND

2024 ADMISSION OPEN NOW FOR GRADE - XI

■ ARTS
■ COMMERCE
■ SCIENCE

■ Though the Board Exam Results are yet to be declared, classes for the New Batch of Grade-XI (All Streams) for 2024-25 Session will begin from 4th April 2024 onwards to give students an advanced upper edge.

■ Forms available between 9:00am and 2:00pm at the LFI Accounts Section.

■ 100% Concession for Grade-XI in both Hostel & School Fees will be granted to Meritorious Students from recognized Boards.

■ 25% Concession for Grade-XI in both Hostel & School Fees will also be granted to students with excellent flair in Sports, Art, Music & other such skills.

■ INTRODUCING FIRST TIME IN NAGALAND Adventure & Jungle Survival Tactics and Combat Skills by URBAN JUNGLE.

■ Martial Art - Nagaland Pensak Silat

■ Music classes - Musik-A (Aloba Naga & Team)

■ Football Coaching - Dimapur Football Club

■ Zumba Fitness Classes - PAWF Nagaland

■ Art & Calligraphy - Wandering Minds

■ Horse Riding

JOIN US ON SOCIAL MEDIA
livingstone.nagaland@gmail.com
livingstonenagalnd.com
livingstonenagalnd



March 21, 2024 nü New Delhi nung aliba AICC headquarters nung Congress lenir Sonia Gandhi, Congress Tir Mallikarjun Kharge aser party lenir, Rahul Gandhi nungeri osangbenertem den jembidang tangokba noksa nung angur.

Election Commission-i Electoral Bonds indang osang ajak sangdong

New Delhi, March 21 (Agencies): Brihostibarnü Election Commission-i parnok indang website nung SBI-i parnok nem agütsüba electoral bonds osang ajak sangdongogo.

Supreme Court tetuyuba nung ajemdaker Election Commission-i 'alphanumeric numbers'-a sangdongogo, koba ajanga electoral bonds alizükertem aser senotsü anguba yimtenren party tem na

tsüngda tesendaktep sayur. Electoral bonds osang tasenba nungji tenla agütsürtem aser tenla agizüker party tem indang list ana densema lir.

Election Commission-i X ajanga, electoral bonds osang parnok indang website nung upload süogo; Supreme Court tetuyuba nung ajemdaker SBI-i March 21 nü Election Commission nem electoral

bonds osang agütsü, ta metedaktsü. Electoral bonds osangji eci.gov.in/candidate-politicalparty website nung angutsü.

Electoral bonds ayoktsü atema temelaba agütsüba bank ji State Bank of India dang liasü. Iba scheme ya 2018 küm tenzüka liasü saka taoba ita Supreme Court-i iba scheme anentsüogo.

ED-i Excise Policy ken o dak sendakba nung Kejriwal puogo

New Delhi, March 21 (Agencies): Brihostibar nikongdang Enforcement Directorate (ED) team ka Delhi Chief Minister aser AAP tongti lenir, Arvind Kejriwal'er kidangi oa pa dang Excise Policy ken o dak sendakba nung pa dang asüngdangyaba sülen pa puogo.

Iba ken o dak sendakba nung tamalen ED-i pa tekuben tashi jaoka liasü.

Anogo ishika tejaklen iba ken o nung BRS lenir, K Kavitha pua liasü aser tang mezüng iba ken o nung Kejriwal ya 'asalentong yanglur ka' ta züngshir.

ED team-i Kejriwal aser par kibong züngsemtem phone-a meshizükogo ta osang angazüker. Tensa meraksatsü atema Kejriwal'er kima security sepai aika lemzüktü aser par kidangi aoba lenmanga nokdanga liasü. Par kima Rapid Action Force (RAF) sepaitema

reprangdar. Nisung shinga par ki telungi meidaktsüba apibo parnoki pa aputsü atema renemer asütsüa akok," ta metedakja liasü.

Tamalen Delhi excise policy ken o dak sendakba nung AAP lenir Manish Sisodia aser Satyendar Jain nabo pua jail nung puokogo saka Satyendar Jain bo tang bail nung chioka lir.

Delhi sorkari 2021-22 kümsük nung excise policy kübok yi shishilembartem nem license agütsütsü atema sübokremagi, ta tai tonglokja lir.

Tangbo iba policy ya agienadokogo aser taoba mapang Delhi lieutenant governor-i iba ken o ya CBI nem agütsütsü atema benok. Iba sülen ED-i PMLA (Prevention of Money Laundering Act) kübok ken o benoka liasü.

Ano külen Kejriwal'er team-i Supreme Court dang tang rongdak süa temepishiba ken o angadangdaktsüner, ta mepishia lir.



March 21, 2024 nü Kathua district nung Lok Sabha election atema nüboyim sentong ka nung taoba mapang WWE wrestler Dalip Singh Rana (The Great Khali) den Union Minister aser BJP candidate, Jitendra Singh na den tangartem noksa nung angur.

2050 küm tashi nungbo India nung tanur asoba kanga ajema akümtsü

New Delhi, March 21 (Agencies): India nunger total fertility rate (TFR) mesüra tetsür shia tanur asoba kanga ajema akümtsü; 2050 küm tashi nungbo India nung TFR ji 1.29 tashi ajema akümtsü, ta study tasen ka ajanga metedaktsü.

1950 küm India nunger TFR ji 6.18 liasü saka 1980 küm tashi nungbo 4.6 dang aktüm aser 2021 küm tashi nung 1.91 dang kümogo; nütsüng shidak ayutsü atema tetsür shia tanurji (average) 2.1 alitsüla.

Lancet indang study ji shidak süra taruba kümtem nungbo India nung nütsüng kanga ajema akümtsü, ta mongintemi metedaktsü.

Population Foundation of India (PFI) nung executive director, Poonam Mutreja-i, rongsenkettzung tsütsü linüktem renlokba den külemi tanurtem mesütetsü atema-a sen teimba indoker, ibayongji kibongtemi tanur ajema agütsüa akümer, ta ashi.

"Shisaliok jenjang tajungba akümba aser tetsürtem nem tashi agütsüba ajanga nükjidong

tuluba yur kibong menoak makümer aser menor tanur asor, ibaji ajanga TFR tajemba akümer. Iba dak alia yimtsüngtem nungi jila/yimtitemi oa litepba, family planning, tanur mabentsü benshiba, loktiliba nung temelensi aser kibong tila ayutsü merangba kulitem ajanga TFR tajemba akümer," ta Mutreja-i metedaktsü.

PFI director-isä, India atema item tayongzükbatem ajurutsü atema ano küm ishika lir, ajisüaka asenoki tarutsü nung rangloker tang nungi inyaktsü nüngdak. Tongtibangtibaji tetsür-tebur kasa züngshiba ajungketsütsüla. Sorkartem aser loktilibatemia tetsürtem atema nobentsüba mapang senotsü teindokba ajema kümtsütsüla," ta Mutreja-i ashi.

TFR tajemba akümbaj India linük dang masü.

Lancet study ajangasa, 2050 küm tashi nungbo linük aser territories 204 nungi 155 nungbo (shilem 76) TFR replacement level dang nungi tajemba asütsü, ta metedaktsü.



March 21, 2024 nü Murshidabad district nung taoba mapang cricketer aser TMC candidate, Yusuf Pathan-i Lok Sabha election atema nüboyim dang tangokba noksa nung angur.

2050 küm tashi nungbo India nung tanur asoba kanga ajema akümtsü

New Delhi, March 21 (Agencies): India nunger total fertility rate (TFR) mesüra tetsür shia tanur asoba kanga ajema akümtsü; 2050 küm tashi nungbo India nung TFR ji 1.29 tashi ajema akümtsü, ta study tasen ka ajanga metedaktsü.

1950 küm India nunger TFR ji 6.18 liasü saka 1980 küm tashi nungbo 4.6 dang aktüm aser 2021 küm tashi nung 1.91 dang kümogo; nütsüng shidak ayutsü atema tetsür shia tanurji (average) 2.1 alitsüla.

Lancet indang study ji shidak süra taruba kümtem nungbo India nung nütsüng kanga ajema akümtsü, ta mongintemi metedaktsü.

Population Foundation of India (PFI) nung executive director, Poonam Mutreja-i, rongsenkettzung tsütsü linüktem renlokba den külemi tanurtem mesütetsü atema-a sen teimba indoker, ibayongji kibongtemi tanur ajema agütsüa akümer, ta ashi.

"Shisaliok jenjang tajungba akümba aser tetsürtem nem tashi agütsüba ajanga nükjidong

tuluba yur kibong menoak makümer aser menor tanur asor, ibaji ajanga TFR tajemba akümer. Iba dak alia yimtsüngtem nungi jila/yimtitemi oa litepba, family planning, tanur mabentsü benshiba, loktiliba nung temelensi aser kibong tila ayutsü merangba kulitem ajanga TFR tajemba akümer," ta Mutreja-i metedaktsü.

PFI director-isä, India atema item tayongzükbatem ajurutsü atema ano küm ishika lir, ajisüaka asenoki tarutsü nung rangloker tang nungi inyaktsü nüngdak. Tongtibangtibaji tetsür-tebur kasa züngshiba ajungketsütsüla. Sorkartem aser loktilibatemia tetsürtem atema nobentsüba mapang senotsü teindokba ajema kümtsütsüla," ta Mutreja-i ashi.

TFR tajemba akümbaj India linük dang masü.

Lancet study ajangasa, 2050 küm tashi nungbo linük aser territories 204 nungi 155 nungbo (shilem 76) TFR replacement level dang nungi tajemba asütsü, ta metedaktsü.



TIR YIMYIM

YIMOBILEM (EDITORIAL)

DIMAPUR ROGONÜ, MARCH (METSÜREMI) 22, 2024

Yimsüsüri ajak agiadok nungbo!

Tanü lima nung aiben yimten nung yimsüsürtem aika nübortem asoshi tapet ozüng yanglua yimsü asütsü atema shimdaktsü asü (?) mesüra pei takar akümtsü asoshi senotsü bushitsü atema yimsüsür akümar mebendangtet ka pei libaliro aser inyaksangshi nung angur. Aji oda, nübortem asoshi inyaktsü shimtetba yimsüsür kati government contract mapatem par chirnur aser kinungertem nem dang inyakdaktsüra, pa mesüra la yimsüsütsü shimer nübortembo kechi inyaktsü? Kasaji, yimten yimsüsür kati government nungi agütsüba aser angutsüba teyari ajak pa agir tanüngba par kinungertem nem lemtsüra, par nübortembo kechi agitsü? Iba mesükba ken o ka Arunachal Pradesh nung Chief minister Pema Khandu'er kinungertem anema Arunachal nung mulungtet telok (NGO) kati supreme court nung ken o aguja lir. Iba ken o ya agizüka angadanger, Supreme court-i tang Comptroller & Auditor General (CAG) dang bushisüngdang mapa tenzüksü nungloktsüogo. Arunachal Pradesh Chief minister-ba anema okadak ken o benokertemi ashiba agi, government contract mapatem den jang abenba aser alemba mapatem dena Chief ministeri par kinungertem nem dang inyaktsür aser yimten tashi amshia ochimashi mapa tenük amur inyaker. Aji oda, jang abenba aser alemba mapatem ajak nung meshitak bill sen crore aika jenjang yanglua agiogo ta Pema Khandu mapa aija okadak ken o benokertembo aija lir. Ibajit shitak asü meshitak ken o benokar ajibo obendangertemi dang ashitsü, ajisüaka tanü Arunachal Pradesh nung atalokba o Nagaland nung atalokba mapatemji kasasa dang ataloker amai angur. Tepilaji, Arunachal Pradesh nungbo mulungtet telok (NGO) kati yimten tashi amshia yimsüsürtemi nübortem ashiokja inyakba ochimashi mapatem nungi nübortem kümzüktsü asoshi nüngsen aser anibelem agia okadak ken o agütsüogo saka asenokibo okadak ken o agütsüsbajibo yur ola dena madoki pei awazünntsü awazüdkaktsür. Atangji, asenok dak tangatetba ka lir, aji election nung toktepertem sen kanga endoker, anungji aji menokdaktsütsü atema anü merüa pua asüyonga ochimashi mapa agi ochi mapa kümmer sademsadema inyakdaktsür. Aji oda, government nung alirtemi government contract ajak pei chirnur aser kinungertem nem agüjaka ola madokba tetezüji nübortem temeten aser olaji yokadokogo mesüra alizükadokogo. Ashi, Nagaland nung lenmang yangluba súshia, kiojen yangluba súshia mesüra koba mapatem nungsa sen lir, item mapatemjibo yimten nung yimsüsür chirnur, kinunger mesüra tesendaktep alirtemi dang inyakba angutsü. Shitakbabo government contract inyaktsübare aser ozüng nungbo yimten yimsüsür kinunger aser adianutem nem government contract mapa agütsütsü memelar aser aji tim, kechiyong yimten tashi amshia yimsüsürtemi tagitarutsü ajak pei kinungertem asoshi südena ayu nungbo nübortembo kechi agitsü? Iba inyakyim aser temeten meteta tangarbo ola adoker saka asenokbo tim masüba mapatem anema ola adoktsüba nungbo nisunga shinga mali amai azüngazunga akümer. Iba lagi mapa majunger aser yimsüsürtem takar akümer aser business inyaker aser aluyimertem sensaker akümer. Ibajit mashikoshi lima lir. Iba limaji azükaru masütsü aser iba lima nung tesünep malitsü. Koba lima nung yimsüsürtemi rongsen bushir, iba lima nungji ozüng amshir malitsü aser auer aser ashir telok poktettsü. Atangji, yimsüsür aser par kinungertembo contract aser business meinyaktsü ta masü, inyaktsü saka pei inyakyim kübok yimten tashi amshia pei kinunger aser adianu apia government contract lemra, yangi ana nung alibaa ni aser oagi alibajia ni ta tagitsübo ajak asen agitsü mekabanga ayur asütsü. Ibajit ozüngi memelar. Shitakba sobaliba metetba aser nübortem meimba yimsüsür katibo tagitsü nung pei tama masü nübortem tama südaktsütsü aser takoksa aser lendong nungbo nübortem dang nungi pei tama asütsü. Iba lagi yimsüsürbo pei atema inyaktsüa mapang mangu timatemer aser pei nübo, mapang aser rongsen ajak nübortem nem tenla agütsür. Atangji, ibajit nübortem daka tuluka keta lir.

OLEMSABANG

Temerenshi aser Timtim

~ Imnakala (Chümoukedima)

(*Yashi adok nungi...*)

Ya kanga tetsübutsü

Kechiyong temenen aser memeshiba nisungtem, shirnoki memeshiba nung ochi nungtemer, parnok anema Tsüngrem ain adokba kotak nungi jungkai adoka lir 19 Kechiaser Tsüngrem indang kechi metettsü akok, ibajit parnok dak jungkai adoka lir, kechiyong Tsüngrem ibajit parnok dangi jungkai adok. 20 Kechiyong alima yangluli nungi tatem makaba Pa ain aser Tsüngrem yimya itemji nunguaka teyamluba asettem ajanga itemji angateta jangjajangja dang jungkai adoka kar. Anungji parnok telangzülen maka. 21 Parnoki Tsüngrem meteta lir, saka parnoki tim tetrushi mesüra nngsang magütsü, saka parnoki amajok tekülemba shisatsütem nung ali, aser parnok merajemba mulongjang manga kümduktsü 22 Tashitemeter ta shia, parnok sasa tamashirtem aküm. 34 Anungji parnok rongnung pei temang mezüngmeshidaktsütsü asoshi Tsüngremi parnokji memerükbalen parnok mulongjang jabujari nem bendanga agütsü. 25 Parnoki tiazü den Tsüngrem ochiba melentep aser teyanglur den shiba teti asangtsü tim ibajit melena teyamluba osettem akhum tsübu aser tenzük. Amen. 26 Anungji maksütsü shi azü jangraba nem Tsüngremi parnok bendanga agütsü. Kechiyong tetsürtemi yimya benshiba, kazüba toktsür koba yimya masü aji parnok rongnung inyak. 37 Aser kesaji teburtemia tetsür den kazüba yimya toktsür kati ka den jabujari tenzük, aser parnok mashikushi yimya benshiba talang pei dak atalok. 28 Kechiaser metetba shisatsü agi inyaktsü menangzük nung tim masüba mapa inyaktsü asoshi aser taktsü maketba temenen mulongjang nem Tsüngremi parnok bendanga agütsü. 29 Parnok tamajung tara, tenükshiba aser shisatsü tamajung agi sunga lir. Parnok nükmerem, tepsetba, rarabangsen, tekülak aser tesempa agi sünga kar. 30 Parnok nüngsenbangsen o jembirtem, ashikülaker, Tsüngrem toktsüba aser Tsüngrem mezüngmeshiba nisungtem aküm. Parnok tekong temerang, nalokmara, tamajung mapa shisadanger, tsürabur dang tashi mangartem, 31 Mangatetba, akhüm maket kibong temeimtep makaba, yimlibilem makaba purtem dang lir. 32 Yamala mapa inyakertem tasütsü tetemsü ta Tsüngremer ozüng lateta lir, kechiaser parnoki itemji inyakba dang masü, saka ano itemji inyakba nisungtem dang parnoki pelar.

Memelenshira

Tsüngremi memelabaji benshira pei kibong, tsürabur, adianu, senmang, shi temang nung Tsüngremer tejashiba arutsü, idangji kümzüktsü makokba jenjang kati arutsü, Tsüngremi sendokra alima yimya agi kümzüktsü makoktsü.

T. Ken 137 – Israel tepuokdak mangyimba ken.

137: Kodang onoki Zion bilemtet Babelon ayong anasa, yangji onok amen, hau onoki ajeb. 2. Willow süngdong rongnung onoki kongki itaka ayu. 3. Kechiyong yangji parnoki onok tepouker küma anir ao, parnoki onok dang ken atentsü asüngdang, aser onok reshikangshiri onok dang pelatepang ta aser "onok dang Zion ken ka tenang" ta ashi. 4. Bendang lima nung kechi koda onoki KIBUBA ken tentettsü? 5. Oh Yirusalem, ni na amadokra, kü teka tajichi ashirepdakjang. 6. Ni na (Tsüngrem) mebilemtetra, kü tepela tematiba dang taoba ni Yirusalem meyutsüra, kü temeli kü teküm nung neploka kümdukjang.

Tsüngremi-a, Ojalaia sendoktsü, tansütsü ne temang nung teshinem agi nai laktettsü. Aiatai.

Otembang

Tsüngremi memelaba temenen mapa shibai meladir:

1. Governor
2. Obendanger
3. Yimsüsür
4. Arogo

Nenok bangdakpur shiri meladir aibelener temerenshi den kesa ne dang Tsüngremi merenshitsu. Sodom rongdokba bilemtetdang, tatem maka mulumi bilemdangang. Tsüngremi memelaba anema shibai melatsü akok, temenenji asenok ajaki tepsetetsü.

2 Timoti 2:2 Kuli aika tsüngdang nai ni nungi kechi tesayuba angazük, ano nai temulong lemtetba nisungtem nema iba tesayubaji yamala tangar sayutsü akokba nisungtem nema nunglokjang.

**Iba Olemsabang nung lemsaba ken-o aser shisatsü ya iba ocet züldü
bilemba ken-o ama tazüngeri angateta agitsü mepishir**

UP nung Hinduteloktemi Khristantem anemaken o benok



March 17, 2024 nü Uttar Pradesh kubok Ghaziabad nung Khristantem sentong ka nung tangokba noksa nung angur.

March 21, 2024: Amongnu nung sensaker Hindu nungertem nem Khristan yimsü indang kakettem lema agütsü, ta tai tonglokja Kaushambi police station nung ken o ka benokba sülen mangattep adok.

Khristantem lemtsüba kakettem nungji Lai tekongtem keta liasü aser Hindu nungertemji sentong ka nung adentsü jaok, ta Hindu nunger teloktem lagi metedaktsü.

Vishwa Hindu Parishad (VHP) densema Hindu telok balala nungi züngsemtemji Khristantem sentong agiba tesem lagi aruba sülen timtem agütsü.

Khristantem lema agütsüba kaket nungji, "Satan-i yimsüba anenba mapang

nung alima ya koma alitsü?" aser "Asürtem tanaben shia arutsü asü?" ta zülüa lir.

Kaket nungjisa Khristantem March 24 aonung 7:45 ako nung Park Crown Banquet Hall, Kaushambi nung ayongzükba sentong ka nung adentsü jaoka lir.

VHP züngsemtem jagi, Hindu nungertem iba sentong nungji dendaktsü atema senotsü agi mesüzuka liasü, ta tai tongloksü.

Hindu nungertem nem lema agütsüba kaket nungji 'Yisu Khristai tenla agütsüba bilemtetang', Luk 22:19 züngang aser 'Asürtem tanaben shia arutsü' densema oren aika zülüa liasü, ta Hindu nungertem lagi metedaktsü.

Hindu nunger teloktemi, America aser Korea nunger missionary tem densema Khristantem Kaushambi area

Baptist Union nungi pastor temi kasa kiyimba nung shilem magitsü

March 21, 2024: Baptist Union Council-i kiyimba dak sendakba ozüng melenshitsü atema vote agütsütepa telemtetba agiogo aser maneni Baptist partor temi kasa kiyimba (tetsür o tetsür na mesüra tebur o tebur na kiyimba) nung shilem magitsü.

Kiyimba dak sendakba ozüng melenshitsü atema Baptst Union Council nung vote agütsütepa liasü; Baptst pastor temi kasa kiyimba nung shilem magitsü pusema vote 49 agütsü aser item ama kiyimba nung shilem agütsü pusema vote 27 agütsü.

Baptst Union Council-i sangdong ka ajanga, "Iba maparen nung timtem ajangshiba atema sasar, koba ajanga iba telemtetba agiogo. Council-i telemtetba agiogo aser consultation report ji ajanga Baptst kibong nung tangatetba balala aliba sayur," ta metedaktsü.

Baptists' Together nung general secretary, Lynn Green-i, mapang talangka iba atema jembia aruba sülen iba telemtetba agi, ta metedaktsü.

Baptists' Together ya UK nung Baptist Union tulutiba lir.

zungsem 90 shi lir aser parnoki Baptists Together nung tongti küm benoka liasü aser 2022 küm March ita nungi Council nung iba onük benoka liasü.

Local Arogotem dang pei tebilemba asüngdanga liasü aser Arogo shilem 52 aser accredited ministers shilem 92-

i telangzüba agüja liasü.

Lynn Green-i Baptist Arogotem dang, item telemtetbatem ajanga nüburtem taküm nung kongshir aser parnok ya Khrista nung asen adianutem aser aianutem lir, ta ashi.

Laisa, "Asenok tangatetba anemer züngsemtemia asen tangatetbatem akhümtsübur.

Council-i onok dang kiyimba dak sendakba ozüng melenshitsü atema benokertem dang temeim sayutsü mepishiogo," ta metedaktsü.

Laisa, "Iba telemtetba atema o lemteptsü asoshi social media mamshidaktsüner. Tejak chitepa o lemtebatem ajanga

dang asenok longjema alitsü aser maneni Yisu sülen anidakdang kati ka aliba kiyimba teratet ajungshitepa alitsü," ta metedaktsü.

Tesüiba küm ishika tsüngda UK nung Baptist Arogo karibo kasa kiyimba nung shilem agütsü atema telemtetba agiogo.

Ajisüaka Baptist Arogotem teimbakati, Laishiba nung shia aliba kiyimba teratet melenshira ibaji ajanga Baptist denomination nung telema adoktsü, ta ashir.

ANOGO ABEN TSÜNGREM DEN

Alartem alizükba

"Aser nenok pei meyong masü; kechiyong nenok dalang agi ali, anungji nenok temang nung Tsüngrem sentsuwangshidakjang." I Korint 6:20.

Tsüngremi asenok alizük. Jenjangji kanga tasak - Pei Chir ka dang aliba agütsü - saka nükjidongji tejangja : talila techirtem ajangzüktsü. Inyakyim timtem aser tebilemtsütemji jenti, saka tatok agütsübaji teperi.

Alar ka aliba nung alari aginüba ashitsü kecha temeten mali. Iba shishilemba ajak nem lapoka yutsü. Alarji ajaki ngua moapu nung ayu. Oset ayokba ama shibai timba agutsür pa nem agutsü.

Tsüngremi asenok Pa meyong akümtsü asoshi asenokji kechi koma taküm kecha masüngdangi alizük.

Alima rangben alizükba indang 2 Peter 2 nung Peteri rasaa ashi. Khrista nung asen tamang agi mapa inyaker aser aji kija mapa. Iba mapa nung asenok mapaji tamang, Tulusang sentsuwangshidaktsütsübaji asenok mapa.

'Alar kari parnok teka nung yinzü yokdang parnok tarutsü taküm tia metettsü akok. Alar dang nungi asenok tangatetba tejangjaba lir. Laishibai asenok ya Tsüngrem meyong ta ashir. Techir akümba tobur tajung angutsü asoshi Kibubai asen tenük lapoktsü. Asen teinyaktsü. Lenmang aser tanela nung Kibuba sentsuwangshidaktsütsübaji lir. Asen temang Pa meyong. Asen tanela Pa meyong. Nai meteter ma ?

Uganda linük nung Muslim nungertemi sayutsüngir ka tepset

Nairobi (Kenya), March 21 metedaktsü.

(Agencies): Uganda linük nung Khristan sayutsüngir kati Muslim nunger aika Khrista agizükdaktsüba agi Muslim nunger kari March 8 nü pa tepsetogo.

March 8, 2024 nü arrshi küm 45, Kiisa Masolo-i Nakaloke aser Busajjabwankuba yimi lenmangtem nung sayutsüngia jajaba sülen aonung 7:00 ako meta Sironki district kubok par yimdak, Nakitiku-i meyipa aru. Iba sülen Muslim nunger teneti pa kidang nungi anizüka anir ao, ta tetsü Norah Nandege-i metedaktsü.

"Muslim nungertemi phone ajanga Masolo aiben amokmerena aruogo saka nai tashi mangaba agi nü taküm tembanger' ta zülur liasü," ta laisa metedaktsü.

Osangbener den jembidang Nandege-i, "Pa anizüka anir aodang nisung asemi kütang 'Allah tsüngremi ner jabaso dang kanga mepelar, anungji onoki pa nem temerenshi agütsütsü' ta ashiba sülen oadok," ta metedaktsü.

"Ni kin lenir ka jaa iba osangji ashi saka pai kütang anepdang tashi atadi ta ashi. Anepdang ozü jabaso meshilangba agi ni Local Council 3 chairperson nem osang metedaktsüba sülen pa bushi tenzüka liasü," ta laisa metedaktsü.


Masolo tekolak aser tekong nung yiruba zübo liasü. Pa ya Mbale nung aliba Calvary Temple Arogo nung züngsem ka liasü.

AO OSHI ANGAZÜKDAK:**TANÜ ANGAZÜKTSÜBA OJANG****Süasüa****(adv)** tanem tanemi (slowly)

* Sakobai o süasüa kanga junga jembir.

Süsüsüsüa**(adj)** medemmedema, tesepra masü (smooth)

* La tejak kanga süsusüsüa kümogo.

OLONG PAITEP # 6734**TIPLÉN**

- | | | | |
|--------------------------|-------|--|-------|
| 1. Saku | - (4) | LANGTSÜNGLEN | - (3) |
| 6. Songjen | - (7) | 1. Taksep | - (3) |
| 7. Mali/Tazüng | - (4) | 2. Langtem | - (5) |
| 9. Tasen apok | - (6) | 3. O tamendaktak | - (4) |
| 11. Songtem | - (3) | 4. Nütü tebuba | - (3) |
| 13. Ata liasü | - (5) | 5. Anüngdang tesangwa | - (3) |
| 16. Tzüngüdenkülemtsüker | - (3) | 6. Apitel | - (5) |
| 17. Aso tila | - (6) | 7. Yagi jungdaktsür | - (4) |
| 20. Tashi maküm | - (4) | 8. Anogo semer ka | - (3) |
| 24. Tenüng kasa jatepba | - (7) | 10. ... tatsü | - (3) |
| 25. Ki yangluba oset | - (4) | 12. Tebur kidong aser zünga kasa tsüngda jalepba | - (4) |
| | | 14. Pela agizükba tapu ka | - (5) |
| | | 15. Tenüng atet | - (3) |
| | | 18. Mejanga onü | - (5) |
| | | 19. Talak techira | - (4) |
| | | 21. Maneni | - (3) |
| | | 22. Nubo teyi | - (3) |
| | | 23. Meshi | - (3) |

OLONG PAITEP # 6733 TELANGZÜBA**TIPLÉN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

1. Alimang, 2. Pongan,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

Happy Birthday

TENÜNG

Tasoba anogo
Küm
Talidak
Jala küm 1 Tashi anir aroba asoshi Tsüngrem tenüng asanger. Küm tasen ka nung ayaoka jajadang, maneni La taküm arishi anogo tajung temjena moajangma ta teyanglur Tsüngrem dang sarasademer.

~ Temeim Tsürabur, oya Aien,
otsü aser kinungtem

LENSAYULA

- 22nd March
- 1
- Lower AG, Kohima



Tanur asoba anogo nung salem osang den noksa angati adokdaktsünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

**Tepela
Tasoba Anogo**



Mizoram nung Congress kija Lok Sabha elections nung tokteptsü

Aizawl, Metsüremini/March 21 (Agencies): Mizoram nung Congress party-i Lok Sabha elections nung parnok kija tokteptsü telemtetba agiogo. Opposition Mizo National Front (MNF) den lonejemer tokteptsü atema election magi tsüngda sensaksema tamakok anguba sülen parnoki iba telemtetba agia liasü.

Ajisiüaka party ana tsüngda sensaksem tangatettep ka dangi maruba sülen Congress-i Mizoram nung Lok Sabha election nung parnok kija tokteptsü telemtetba agia liasü.

Kasa mapang nung taoba Mizoram chief minister Zoramthanga-i anir MNF pur BJP-i aniba Northeast Democratic Alliance (NEDA) den sendaktepa lir aser national

Taoba mapang Congress, shirnoki 1987 küm nungi küm metsü tashi Mizoram yimsüsüa aruogo, parnoki

Lok Sabha elections: ECI-i Assam CM tenu transfer yoktsü tuyu

Guwahati, Metsüremini/March 21 (Agencies): transfer yoktsü telemtetba agiogo.

Election commission of India (ECI)-i Assam nung Lok Sabha election kecha tebendang makai ochishia agidakstsü aser atema jenjang agia aruba nung shilem ka ama SP Sushanta Biswa Sarma transfer yoktsü tetuyuba agütsüogo.

Iba den bendenloksema election commission-isa, state kar nung "non-cadre" district magistrates aser superintendents of police tem mapa melenshitsütsü atema tetuyuba agütsüogo.

ECI-i, "non-cadre" district magistrates (DMs) aser superintendents of police (SPs) tem mapa melenshitsüogo, kechiyong item mapatem ya Indian Administrative Service (IAS) aser Indian Police Service (IPS) officers tem indang mapa lir ta jangjashitsüogo.

April 19 nü nungi tenzüka election shilem tenet kuma

Assam STF-i pua aliba ISIS züngsem ana NIA-i nem agütsüogo

Guwahati, Metsüremini/March 21 (Agencies): Assam police IG Partha Sarathi Mahanta-i

Iba sülen NIA-i ISIS lenir ana ya Guwahati yimti nung special NIA court kati anir oa liasü.

Iba osang ya inspector general (IG) of Assam police Partha Sarathi Mahanta-i Bodhbarnü metedakja liasü.

"Ken o bangdaka aliba ajanga onoki nisung ana NIA nem bendanga agütsüogo. NIA-i tena parnok ket nung ayutsü atema belenzükogo," ta

Bodhbarnü Assam police indang special task force (STF)-i kiralongrar anema meita aoba sentong ka

ayongzüka agiba mapang tongtibang ISIS lenir ana pua

liasü.

Itangiter osang dak ajemdaker Assam STF team-i



Imphal: Manipur Angh, Anusuiya Ukey-i Bodhbarnü Manipur University of Culture nungi Pukhrambam James Singh & Shukhdeba Sharma Hanjabam

Nigeria tiri sorkar ketcangsürtem bendang limai meyoktsü ajemtsü.



Bola Tinubu

Abuja, Metsüremi/March

21 (Agencies): Sorkar sen amshia minister aser sorkar ketcangsürtem bendang leni sorkar nüngdak asoshi aoba ita asem atema Nigeria Tir Bola Tinubu-i tenokdangba agütsüsü.

Sorkar ketcangsürtem senzü-sempongbang nung senjeni indokba asoshi tiri bilema iba ya agitsüsa akumer, ta Tinubu indang chief of staff-i ashi.

Iba tenokdangba ya April 1 nungi tenzüktsü.

Tir Tinubu aser par administration tanen makai bendang limai aoba atema kariboa aija arur.

Taoba küm November ita Dubai nung COP28 climate conference nung adentsü asoshi par sorkari nisung 400 dak tema sponsor asüba sülen nisung aikati, talisa social media

nung pa aitsü.

Pa May 2023 nung tir mapa agizükba sülen Tinubu ya bendang limai 15 ben dak ogo.

Nigeria Tir Tinubu ya tir mapa agizüker mezüng ita trok tsüngta linük telungzük aser bendang lima sema jajaba mapang sen 3.4bn naira (\$2.2m; £1.8m) shi indok ta ashir, koba 2023 atema renemba budget dang shilem 36 shi agi timba ta Nigeria nunger osangkaket Punch ajanga January ita shia liasü.

Tinubu indang chief of staff Femi Gbajabiamila-i ashira agi, Nigeria nung tang rongsenketzung tsütsü timtem ajurua aliba mapang aser senotsü tajungba nung ketcangsütsü nüngdaka aliba mapang iba tenokdangba agütsüba ya ajanga sentüsü

Iba West African linük nungya küm aika tsüngta 'cost-of-living' timtem tamajungtiba tang ajurua lir aser iba yongji nüburtem kanga tim atemer aser jashiteper.

Nüburtemi pa dang mepelaba ajemdaktsü asoshi Tinubu-i sentong balala atongba rongnung sorkar ketcangsürtem ita asem asoshi senzü-sempongsü nokdangba ya tesenba alitsü.

January ita nunga Nigeria tiri pa sülen anidakertem densema k e t d a n g s ü r t e m senzüsempongbang nung nisungtem shilem 60 shi agi ajemtsü sangdonga liasü.

April ita nungi iba tenokdangba benokba sülenbo sorkar ketcangsürtem kangasa nüngdakba mapang dang bendang limai aotsü. Parnok aotsü hopta ana shi lia Tir Tinubu nungi temelaba agitsüsa akumtsü.

Senzüsempongbang anenba ajanga sorkar ketcangsürtem pei mapang tajungtiba nung inyaktsü asoshi rangloktettsü, ta Gbajabiamila-isa ashi.

Sorkar ketcangsürtem senzüsempongbang ajemtsü sangdongaka Tinubu-i pa senzüsempongbang ajemtsü indangba mashi.

Indonesia anasa tzüyim nungi Rohingya refugee 69 kumzük

Medan, Metsüremi/March

21 (Agencies): Indonesia indang Aceh province tzükum anasa süng agi yangluba rong ka nung nisung 150 shi mener makepokba lendong nungi Rohingya refugee 69 kumzük.

Tebur 42, tetsür 18 aser tanur toku rongnendaki anir aru, ta Commission for Missing Persons and Victims of Violence (KontraS Aceh) ajanga Brehostibarnü ashi.

Ajisüaka ano nisung aika tzü agi arakseta sur alitsü südi ta amanger. Iba rong ya Aceh tzükum nung aliba Kuala Bubon beach nungi kilometre 19 (mile 12) shi pilar Bodhbarneptzüsem yipru ajura timtem tenzük südi ta amanger.

Aji masüdang Acehnese angopur temi tetsür pezü aser tebur ana rong nungi kumzükta liasü aser parnoki UN Refugee Agency (UNHCR) ketcangsür Faisal Rahman den jembia liasü.

Takum kumzükka alirtemi ashiba nung nisung aika rakseta asüba amai angateter, ta Rahman-i ashi.

"Nisung kwi asüar mejangjateter, saka par troki ashiba agi, aika sur alitsü südi ta ashir. Rong makepokba mapang nisung 50 shi sur alitsü südi ta parnoki ashir," ta pai osangbener dang ashi.

Süogo ta bilermer ya timba tetsür aser tanurtem aser paroki tzü awatsü mokoki ponger ao südi ta ashir.

Kuala Bubon aliba Aceh Barat district nungi angopur lenir Amiruddin-i ashiba agi, Indonesia indang National Search and Rescue Agency

nungi telok ka Bodhbarnü yokogo.

Kechi ajanga rong ya tzüyim telungi aluar mejangja, saka Bangladesh nung aliba camp tem nungi refugee bene aliba süng agi yangluba rong tem timba majung aser nisung tali mena alir.

2023 küm August ita Bay of Bengal nung rong ka tzüyim telungi alu aser iba mapang Rohingya refugee 17 asü.

Rescue agency temi rong ya kong aliar Bodhbar aonung tashinung mejangjateter lir, ta UNHCR nungi Rahman-i ashi.

Iba lendong atalokba tesem anasa danga rong tem yur kechiba Kuala Bubon nungi kilometre 223 (mile 138) pilar Banda Aceh nungi ang rescue boat ya yoktsüa akum, ta KontraS Aceh indang coordinator Azharul Husna-i ashi.

Akok tashi tekeraba nung refugee tem kumzüktsü ya tongtipang aser ibai Indonesia ketcangsürtem mapa liasü, ta Husna-i ashi.

2016 küm Indonesia tiri totuyuba ka agütsüba nung, tzüyim nung ngutetba refugee tem kumzüktsüla ta shia lir, ta lai ashi.

Kuala Bubon nung alirtem yasüng jila indang rongnendaki ao aser refugee tem nem ali temeden magütsütsüla ta shia liasü.

Nisung kari banner nung Rohingya nunger magizüksü zülüa bener liasü, shirnok pei tasoli Myanmar nung küm aika reshikangshia arur anüolen Rakhine state nung 2017 küm mitkari tashiyim amshiba ajanga

Iba sülen Rohingya nunger million ka shi Bangladesh nung aliba camp tem nung tsüngtena lir aser 2021 küm February ita mitkar temi sorkar atsüngdokba sülen Myanmar nung tensa tali ang tamajungba akumer.

Ajisüaka Aceh nung alirtemi Rohingya nunger anema tali nokdaker, shirnok Malaysia atongtsü meranger, kong February ita tatem tashinung Rohingya nunger nisung 108,500 tejangga liasü, ta UNHCR ajanga ashir.

Taoba küm December ita Indonesian navy temi Rohingya refugee tem mena aliba rong ka Aceh tzükum atongdang meinzuksü yoka liasü.

December ita sa kaketshir temi Banda Aceh nung local community hall telungi ai aser yangji Rohingya nunger 137 shi jenoka aliba meindoktsü takangba agüja liasü.

Indonesia ya 1951 UN Convention on Refugee nung meyongnem agütsür masü saka mapang kabo Rohingya nunger dang taochi sayua liasü. Iba region nung Malaysia aser Thailand ketcangsür temibotao küm Rohingya nunger rong ya parnok tzükum nung arua manendaktsü.

Ajisüaka yangbo iba temeim ya sama aor ama ajiteter aser Rohingya nunger teyari timba angur aser Indonesia nung alidang mapa tamajung inyaker ta Acehnese nung alir temi ashir saka kuli tejangga magütsüter.

Malaysia nunga nisung kari yamaji ashir saka kuli magütsüter.



OFFICE OF THE
LONGKHUM STUDENTS' UNION

MOKOKCHUNG: NAGALAND

"Higher the altitude, broader the horizon"

TENÜNGSANG AGÜTSÜR

Longkhum Students' Union (LSU) ajanga züngsem nungi sorkar mapa nung takok nugtetba asoshi tenüngsang tetushi aser pelaba lemsateper.

1. Mr. Takanungba Lcr,
S/o Mr. Chenangshiba & Mrs. Imrongsungla,
NSSB 2023 tatiang nug LDA cum Computer Assistant ngutetba.

2. Mr. Sangtipong,
S/o Lt. Mr. Temjenyanger & Mrs. Wapangkumla,
NSSB 2023 tatiang nug LDA cum Computer Assistant ngutetba.

3. Ms. Kiremlila,
D/o Mr. Moyangangnen Imchen & Mrs. Imtirenla,
GT (Science) under Directorate of School Education.

Tsüngremi nenok taküm aser wadang ano maneni moajangma.

**Sd/-
Moachiba
President, LSU** **Sd/-
Longrichila S Jamir
Secy. Info & Public Relations**

Indonesia tir election nung Prabowo Subianto-i takok nguogo



Jakarta, Metsüremi/March

21 (Agencies): Indonesia nung taoba ita agiba tir election nung defence minister Pravowo Subianto-i takok nguogo ta sangdong.

Pa den tokteper Anies Baswedan aser Ganjar Pranowo nati iba election result anema nokdaktsü nangzük, saka Prabowo-i lungjemtsü ayongzüka liasü.

Taoba mapang mitkar tanishir inyaksang Prabowo yagi küm aika meimchir anema mapa tamajung inyak ta tai tonglokja arur, aser pai vote shilem 58.59 nguteta liasü.

Social media amshir temi pa dak sakloka akum aser TikTok video tem nung pa ya 'cuddly grandpa' ta tenüng jaloktsü.

February 14 nü election agiba sülen Prabowo-i takok nguogo ta sangdonga liasü, aser iba mapanga unofficial tallies nunga pai vote timba anguba sayua liasü. Alima nung lenirtemi pa den tenüngsang agütsü tenzükogo.

Bodhbarnü US Secretary of State Antony Blinken ia pa nem tenüngsang agütsü aser German Chancellor Olaf Scholz ia tarutsü nung pa den külemi tesendaktep tali yangertsü imlabu lemsatepa liasü.

Anies aser Ganjar bhukumer temi longkak aittsu teimla nung election osang mesangdong tsüngta linük yimtiba Jakarta nung sepi 3,000 shi yoka liasü.

North East Games: Nagaland team maneni temaba jenjang nung lir



Dimapur, Metsüremi/March 21 (TYO): North East games 2024 tenzüker tasemnübuba team ajak kanga toktepa asayaba sülen medal tally nung Nagaland team maneni temaba jenjang nung lir.

Anogo asem kanga tokteba asayaba sülen Nagaland team nungi asayartemi ajak senteper medal 72 ngua lir, kong gold medal 31, silver 17 aser bronze medal 24 densema lir

Tasemnübuba mapang tatsüka atemabo Manipur team

temaba jenjang nung liasü saka anogo tembangba tashi nung parnok Nagaland team-i ajateta liasü. Manipur team-i tang tashi nung gold medal 29, silver 18 aser bronze medal densema ajak senteper medal 69 ngua lir.

Assam team maneni tasembuba jenjang nung lir, parnoki ajak senteper medal 78 ngua lir, kong gold 21, silver 30 aser bronze medal 27 ngua lir.

Anogo asem tashi North East kübok state balala nungi asayartemi parnok dak aketba sempet tajungtiba sayua asaya

reprangertem kanga jangradema reprangdaktsüdar aser iba asayamung ya shirnoki akotsü mejangjai state team tem ajak kanga toktepa asayadar.

Asayamung dak sendakba nung osang tejangjaba agitsü atema Instagram: @nagalandolympicassociation Facebook: @Nagaland Olympic Association X: @NagalandOlympic YouTube: Nagaland Olympic Association amala social media nung sabang balala sülen anidaktettsü.

2nd SYU open futsal tournament March 26 nü tenzüka asayatsü

Mokokchung, Metsüremi/March 21 (TYO): Mokokchung District Football Association (MDFA) aküm nung 2buba Salangtem Youth Union open futsal tournament March 26 nungi 28 tashi Mojabi Futsal Turf, Salangtem Ward, Mokokchung nung asayatsü sentong mazüngi renemdaki.

Iba asayamung nung senpet ajak meyokteper (overall total prize)-ji sen 1, 20,000/- den running trophy agütsür. Yaküma iba asayamung nung tanga district nungi densema telok 31-i shilem agi aser taküma longsoa arua shilem agitsü tayongertemi imlar.

Youngsters FC-i champion bena lir. Atongdakbaji Trebuchet aser Chargers FC tasembuba nung liasü. Yaküma amato taküma nije senpet telemsa 5 - Highest goal scorer, Best defender, Best goalkeeper, Best striker aser most promising player-tem shima senpettsütsü.

Mokokchung nung saisapong tsütsü lanur sempet arangshidak nungdakbatem peria maka. Iba tiaji ngua, Salangtem Youth Union, Mokokchung-i lanu putu dak rangloker saisapong luyim tsütsü talisa football jangrartem

nem sabang lapoktsütsü nükla yur 'SYU open futsal tournament' ya ayongtsü lemtet.

Lanur sempet aketterm anitentsübaji lenmang aisü nungi tenungitba aser teyaritep nungdaker. Iba nüklaji yur külén sen lenmang bushia aser temulungertem nungi tenla bendener iba asayamung ya yakü 2023 nungi "focus to endure" omen dak rangloker asaya-a arur. Taküma iba asayamung Mokokchung ADC & MMC Administrator, Chumlamo Humtsoe-i March 26 nü anepdang 11:00 ako nung tenzüktsütsü.

5th MIFT 2024: Arkong aser Artang na Final asayatsü

Mokokchung, Metsüremi/March 21 (TYO): 5buba Mokokchung Inter-ward Football Tournament 2024 final March 23 nü Imkongmeren Sports Complex, Mokokchung nung Arkong aser Artang na asayatsü.

Brehostibarnü tanabuba semifinal Arkong aser Sungkomen na asaya, koba Arkong-i goal 1-0 agi koka liasü. Asaya nung goal ka ya Arkong nungi asayar Tajungsang-i minute 6buba nung idakja parnoki asaya akok.

Iba asaya atema Match Patron ji Majakong Ward Chairman Ojenlepzuk liasü aser

pai iba amala asayamung tajung ayongzükba atema asayamung ayongertem dang kanga pelaba lemsatep. Paisa, asayamung nung shilem agia aliba kiyong aser asayartem ajak nem tenüngsang agüja liasü.

Majakong Ward Chairman-i, semifinal nung shilem agirtem dang parnok sempet melalutsü aser parnok nükjidong tongtetsü atema meranga inyaktsü ajungshia liasü.

Asayamung shibangba sentong aser final asaya March 23 nü 1 ako nungi tenzüka Imkongmeren Sports Complex, Mokokchung nung asayatsü, kong Mokokchung Deputy Commissioner Thsuvisie Phoji tetushi tejaoker asütsü.

MS Dhoni-i CSK captain mapa toktsüogo



Metsüremi/March 21, 2024

(Agencies): 2024 Indian Premier League (IPL) metenzük tsüngda Mahendra Singh Dhoni-i Chennai Super Kings (CSK) captain mapa toktsüogo aser pa melena Ruturaj Gaikwad shimogo.

"IPL 2024 metenzük tsüngda MS Dhoni-i Chennai Super Kings' captain mapa Ruturaj Gaikwad nem agütsüogo. Ruturaj ya 2019 küm nungi Chennai Super Kings nung asaya arudar aser pai tang tashi nung iba club nungi IPL asaya 52 asayaogo," ta CSK-i sangdong ka ajanga metedaktsü.

Pre-captains photoshoot nung Gaikwad-i shilem agi aser tanga team captain tem den ajurutepa liasü. Pune nungi asayar ya tang mezüngbuba iba asayamung nung captain asütsü.

Dhoni tainba küma aoer aser pa taküma July itabo arishi küm 43 ajungtsü anungji taküml IPL ya asayar ka ama pa asoshi tatembangbuba asayamung asütsü ta bilemer.

Pa IPL nung asayatettsü masayatettsü ta bilema aliba mapang Dhoni taoba küm Mumbai nung surgery agiogo aser tawa taneptsü ngua taruba

BILEMDANGANG

"Takok ya tia agi masü saka meranga inyakba ajanga ajangzüteter."